




Preassadieđáhus

Sámi Dáiddáriid ja Girječálliid buhtadusfoandda (SDGB) stipeanddajuolludeapmi 2025

Sámi Dáiddáriid ja Girječálliid buhtadusfoandda (SDGB) lea dán jagi juolludan 31 stipeandda ja oktiibuot 2,07 miljovdna ruvnnu sámi dáiddáriidda ja girječálliide. Ohcanáigemearri lei golggotmánu 15. beaivi 2024, ja 30 dáiddára ja girječálli sáddejedje stipeandaohcamušaid. SDGB hálddaša bargostipeanddaid, mátkestipeanddaid, čájáhusstipeanddaid, prošeaktastipeanddaid, álggahanstipeandda, ávnnasstipeanddaid ja stipeanda eallilan dáiddáriidda. Stipeanddat leat 1 jagi ovddas.

SDGB lea ollu jagiid váldán vuostá ohcamušaid poastta bokte, muhto lea dán jagi bargamin ovtta Sámi Dáiddárráđiin (SDR) ráhkadit digitála ohcanskoviid, mii almmuhuvvo čakčat 2025. Dát šaddá seamma láhkai go eará sámi doarjjaortnegiid maid SDR hálddaša. Dáinna lágiin šaddá boahhteáiggis álkibut sámi dáiddáriidda ja girječálliide ohcat doarjagiid ja stipeanddaid SDGB:s.

Foandda birra

Sámi Dáiddáriid ja Girječálliid buhtadusfoandda (SDGB) (dárogillii *Samiske Kunstnere og Forfatteres Vederlagsfond, SKFV*) lea buhtadusaid geavahanfoandda mas juhkkovuvvo ruhta kollektiivvalaččat sámi govvadáiddáriidda, dáiddaduojáriidda ja dáiddalaš govvideaddjiide ja girječálliide, ee. stipeanddaid bokte.

Norgga kulturdepartemeanta ruhtada girjerájusbuhtadusa ja čájáhusbuhtadusa, Norgga beale Sámediggi ruhtada čájáhusbuhtadusa ja Sámikopiija fas kopijabuhtadusa. Dán ruđas juolluduvvot stipeanddat sihke Suoma, Ruota ja Norgga beale dáiddáriidda.

SDGB stivrras leat lahtut Sámi Dáiddačehppiid Searvvis (SDS) (dárogillii *Samisk Kunstnerforbund*) ja Sámi Girječálliid Searvvis (SGS) (dárogillii *Samisk forfatterforening*). Sámi Dáiddárráđdi lea SDGB čállin 2025 rájes.

Stipeanddat dáiddáriidda

Bargostipeanda

Guovtti dáiddárii lea juolluduvvon dán jagi bargostipeanda: Marte Lill Somby ja Grethe Gunneng.



Gurut bealde: Grethe Gunneng (Govven: Marius Sætersdal)

Olggeš bealde: Marte Lill Somby (Govven: Judit Arupa)

Grethe Gunneng, 330 000 ru.

Grethe Gunneng lea bargan dáiddárin mángalot jagi. Su maŋemuš sierračájáhus lei 2019:s, ja lea searvan olu joavkočájáhusaide. Gunneng áigu dán jagi ráhkadit ovtta installašuvnna mii deavdá ovtta lanja dáiddabargguin sisttis ja goike čoliiguin. Son áigu bargat ovtta Georg Buljoin gii áigu ráhkadit jietnainstallašuvnna. Prošeavtta namma lea “Illu”, ja čájáhusas galget lea olu báccit ja litnaduojit mat gulahallet jietnainstallašuvnnain. Jurdda lea ráhkadit “responsiiva lanja” gos litnaduojit ja jietna, báccit ja luohti gulahallagohtet čájáhusa gussiiguin, ja dan láhkai vuolgahit odđa vásáhusaid ja jurddašeami.

Gunneng oažžu maiddáí mátkestipeandda, ru. 50 000.

Marte Lill Somby, 330 000 ru.

Marte Lill Somby lea Romssa Dáiddaakademiijas vázzán, ja bargá fotografiijain, sákkaldagaiguin, dáiddadujiin, grafiikain, bácciguin ja installašuvnnaiguin. Sus leat leamašan olu čájáhusat dáid maŋimuš jagiid, sihke sierra- ja joavkočájáhusat, ja sus lei gieskat stuorra sierračájáhus Sámi Dáiddaguovddášis, Kárášjogas, 2024. Son lea aiddobeliid ráhpan sierračájáhusa Adde Zetterquist dáiddagalleriijas guovvamánus 2025, ja son lea vel bovejuvvon guovtte čájáhussii Kanadas ja Suomas maŋjelaš dán jagi. Son áigu joatkit bargat «Skrevet i stein»-nammasaš prošeavttain mii giedahallá mo sámi nissonat vásihit veahkaválddalašvuoda lagaš birrasis. Somby áigu maiddáí joatkit duddjot čorvviiguin ja sisttiin dán áigodaga.

Somby oažžu vel ávnnasstipeandda, ru. 27 000.

SDS stipeanda eallilan dáiddáriidda

SDS stipeanda eallilan dáiddáriidda lea juolluduvvon guovtti dáiddárii geat leaba guhkká ángiruššan dáidagiinniska ja sámi dáiddamáilmmis, ja leaba ohcan stipeandda joatkit iežas bargguiguin: Synnøve Persen ja Hilde Skancke Pedersen.



Gurut bealde: Synnøve Persen (Govven: Mari Boine)

Olgeš bealde: Hilde Skancke Pedersen (Govven: Per Heimly)

Synnøve Persen, 115 000 ru.

Synnøve Persen lea dovddus dáiddár ja girječálli. Son galgá ráhkanit ja oassálastit mánnga festiválain dán jagi. Son lea mielde Norgga girjjálašvuoda festiválas Lillehammeris ja dan oktavuodas galgá maid doallat čájáhusa ođđa njuhtamiiguin Galleri Zink nammasaš gallerijas. Persen lea maid álgán bargat iežas vuosttaš románain iežas máttaráhkuid birra. Persen lea guorahallan iežas máttuid gitta 1600-loguid rájes ja lea čohkken dieđuid oktanuppelot máttaráhku birra. Dan vuodul lea Persen juo diktagirjji almmuhan. Dál son áigu joatkit čohkket dieđuid ja čállit prosagirjji. Persen oaivvilda ahte sámi nissoniid mitalusat leat dovdomahttumat ja jávohuhtton. Son háliida ahte girjji mitalusaide čuvvot čáhpes-vilges govat. Stipeandda fágálávdegoddi atná Persena prošeavtta miellagiddevažžan ja dehálažžan, ja lávdegotti oainnu mielde eai leat galles geat leat nu vuđolaččat ohcan dieđuid iežaset máttuid birra ja ráhkadan das dáidaga. Lea dehálaš almmuhit girjji sámi nissonolbmuid mitalusaid ja historjá birra, danin go eanaš oasi lea almmáiolbmuid mitalusat ja historjá mat čállojuvvojit. Persen oažžu dainna stipeanddain vejolašvuoda ollašuttit girjjiis, go dát lea dárbblaš diehttu min servodahkii ja boahhtevaš buolvvaide.

Persen maddái oažžu prošeaktastipeandda, 100 000 ru.

Hilde Skancke Pedersen, 115 000 ru.

Hilde Skancke Pedersen lea guhkká bargan govvádáiddárin, dan rájes go gearggai oahpuinis Norgga dáiddaallaskuvllas. Su dáiddabargguid vuodđun lea maddái luondu ja sámi kultuvra. Sus leat leamaš mánnga sierračájáhusa ja lea maddái searvan joavkočájáhusaide, ja lea hábmen mánnga almmolaš čiknabarggu, earret eará Sámedikkis ja Hámmarfeastta ođđa buohcciviesus. Stipeandaáigodagas áigu Pedersen joatkit bargat ja dutkat iežas hábmenvugiid, ávdnasiid ja teknihkaid. Son bargá eanaš tekstiillaiguin ja son guorahallá biktasiid ja eará tekstiillaid mat leat billašuvvan dahje bálkestuvvon. Dáid ávdnasiiguin son ráhkada ođđa dáiddabargguid mat čalmmustahttet biktasiid ja tekstiillaid mitalusaid.

Mátkestipeanda, SDS čájáhusstipeanda ja SDS ávnnasstipeanda

Mátkestipeanddat:

Grethe Gunneng, 50 000,-
Inger Blix Kvammen, 45 000,-

SDS čájáhusstipeanddat:

Gerd Wevling Matre, 41 000,-
Charlotte Nilsen, 39 550,-
Kirsi Máret Paltto, 40 000,-
Lene E. Westerås, 40 000,-

SDS ávnnasstipeanddat:

Naina Helén Jåma, 11 000,-
Jouni Samuel Laiti, 11 000,-
Joar Nango, 50 000,-
Kirsi Máret Paltto, 19 000,-
Gjert Rognli, 35 000,-
Odd Sivertsen, 30 000,-
Marte Lill Somby, 27 000,-

Stipeanddat girječálliide

Bargostipeanda

Ovttá girječállái lea juolluduvvon bargostipeanda dán jagi: Risten Sokki.



Risten Sokki (Govven: Marit Anna Hætta Klemetsen)

Risten Sokki, 330 000 ru.

Risten Sokki ja su isit áiguba ođasmahttit Konrad Nilsena girjji «Samiske tekster» (1926). Soai áiguba heivehit čállosa dálááiggi čállinvuohká. Nilsena girjjiin leat ollu kultuvrralaš fáttát nugo: irggástallan, buozanvuolta, jápmin, hávdádeapmi, diiddat, soagnu, eatnamiid namahusat jnv. Fágálávdegotti mielas lea erenoamáš dehálaš bargu maid Sokki áigu bargat. Dát girji boahtá leat ávkin sámi servodahkii boahte áiggis.

Sokki oažžu maiddái mátkestipeanda, 20 000 ru., ja ávnnasstipeandda 20 000 ru.

Mátkestipeanda, Prošeaktastipeanda ja SDS ávnnasstipeanda

Mátkestipeanddat:

Inga Ravna Eira, 36 000,-

Rauna Magga Lukkari, 30 000,-

Risten Sokki, 20 000,-

Prošeaktastipeanddat:

Mary Áilonieida Sombán Mari, 41 500,-

Synnøve Persen, 100 000,-

Sigbjørn Skåden, 40 000,-

SGS ávnnasstipeanddat:

Inga Ravna Eira, 25 000,-

Ellen Anne Sara Gaup, 25 000,-

Beate Heide, 25 000,-

Mary Áilonieida Sombán Mari, 24 500,-

Odd Sivertsen, 25 000,-

Risten Sokki, 20 000,-

Álggahanstipeanda girječálliide

Dán vuoru ii juolluduvvon girječálliide álggahanstipeanda.